



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Navalny Russia-i arudang aputsü pai meteter liasü

TAPAK 10

Olympic nung asayatsüpur nem vaccine agütsütsüji onok mapa tongtibangtiba: Batra

VOL. XVIII NO. 99 (ADOK 99) DIMAPUR

KÜPTOKNÜ (SATURDAY) AENJETI (JANUARY) 23, 2021

₹ 5.00

Feb 8 nungi Nagaland nung school lapoktsü

Dimapur, January 22 (TYO): February 8, 2021 nungi Nagaland nung school tem lapoktsü saka iba ya Class 6 nungi 12 kaketshirtem atema dang asütsü.

Nagaland sorkari school tem lapoktsü molunga agizükogo, ta School Education department-i metetdaksü.

Nagaland sorkar nung under secretary Veduta Thira-i School Education, Nagaland Principal Director dang state sorkari molunga agizükba osang sangoktsü.

"February 8, 2021 nungi Class 6 nungi 12 tashi school tem lapoktsü aser Academic Calendar, 2021 state sorkari agizükogo" ta under secretary Veduta Thira-i züluba shidi nung shia liasü.

State sorkari kobi melii school tem lapoktsü atema SOPs/ guidelines latettsütsü, ta paisa ashi.

Tawa tu Education Department Advisor K Tokugha Sukhalu-ia February 2021 nungi school tem lapoktsüba osang metetdakja liasü.

Secretariat nung inyaker ajak R-Day benjung nung adentsü

Dimapur, January 22 (TYO): January 26 nü Nagaland Civil Secretariat Plaza nung 72 buba Republic Day 2021 State level sentong agütsü.

Iba sentong nung Nagaland Civil Secretariat nung ketdangsürtem aser staff ajak adentsü.

NCS nung staff temi anepdang 8:00 AM nung pei pei pick up points nung Secretariat bus ajanga arutsü akok. Külén, Secretariat nung ketdangsür ajak Secretariat Plaza nung nikongdang sentong nung

adentsü tetuyuba agütsüogo. Administrative Head of Departments-i pei pei staff tem sentong nung dendaktsütsü atema maparen inyaksü aser attendance sheet agütsütsü atema tetuyuba agütsüogo.

Nagaland Civil Secretariat nung Supervisor-i Grade IV staff indang attendance agütsü.

72 buba Republic Day 2021 State level sentong nung adener ajaki COVID-19 tetuyuba sülen anidaktsü metetdaksür.

ULFA-I & NSCN-i Republic Day mokdangtsü ayongzüker

Guwahati, January 22 (Agencies): United Liberation Front of Asom - Independent (ULFA-I) aser NSCN teloktemi January 26 nü Republic Day benjung mokdangtsü atema metetdaksüogo.

"India indang Republic Day ta ajaba ya asen tangatetba anema lir anungji onoki iba benjung anema noktangyonga arur. WeSEA (West Eastern South East Asia) nung alir ajak dang iba India yimtenren sentong ya mokdangtsü onoki ayongzüker" ta ULFA-I-i sangdong ka nung metetdaksü.

ULFA-I aser NSCN teloktemi January 26 anepdang 1:00 ako nungi nikongdang 6:00 ako tashi 'General Strike' alitsü ayongzüker.

"Ajisüaka, iba tenokdangba kübok essential aser emergency services madener" ta ULFA-I tanishir Deep Asom-i ashi.

'India Ka, Sobaliba Ka aser Oshi Ka' tangatetba sabang nung Assam sorkari Assam dendaktsüogo ta ULFA-I-isa shia Republic Day mokdangtsü ayongzüker.

Assam nung paper mill 2 lapokshitsü akhanger

Guwahati, January 22 (Agencies): Prime Minister Narendra Modi-i Assam semdangtsüba lia Joint Action Committee of Recognised Unions (JACRU)-i HPC Paper Mills Revival Action Committee den yaritepa Assam nung paper mills ana tenzükshitsü aser itasen meshia lungkak aittsüba osang metetdaksüogo.

January 25, 2021 nü parnoki Silchar nung shimo milen amer paper mill 2 nung mapa inyaka lia asür nisung 80 nem tetushi agütsüba sentong ka agütsü osang metetdaksü.

January 26 nü parnoki Khudiram Statue anasa mener lungkak aittsü. Iba mapang paper mill ana tenzükshitsü aser mapa inyaker nem itasen magütsü aliba agüjang ta takhangba agütsütsü.

Hailakandi district kübok Cachar Paper Mill, Panchgram aser Morigaon district kübok Nagaon Paper Mill, Jagiroad anaprong ya Hindustan Paper Corporation Limited indang unit lir.

Iba paper mill ana nung mapa inyaker tem toba ita 50 jungnüa itasen mangu lir aser iba ajanga mapa

inyaker nisung 80 tashi medical treatment magitetsüsa küma sügo. Tasürtem rongnung nisung pezübo sosetba liasü.

"Sorkari kümtem süia arudang paper mill tenzükshitsü ta tiyazü nangzüka dang arur saka asangsang nungbo mapa meinyaker" ta JACRU president aser HPC Paper Mills Revival Action Committee chief convener, Manabendra Chakraborty-i ashi.

"Sorkari Assembly election matongdang onoki akhangba ama meinyakra, Prime Minister Narendra Modi aser chief minister Sarbananda Sonowal nati Barak valley nung votes meshia arudang onoki lungkak aittsü. Onoki Barak valley nung kibong shia sema iba ashikülak sorkar nem votes meinoktsütsü atema mepishitsü" ta Manabendra Chakraborty-isa metetdaksü.

Brihostibarnü Jatiya Shramik Shakti-ia Jagiroad nung Nagaon Paper Mill jakdang mener lungkak aitba sentong ka agiogo. JSS ya tawa tentetba political party Assam Jatiya Parishad den sendaktepba telok ka lir aser parnoki paper mill lapoktsü atema takhangba agütsü.



Dimapur, January 22 (TYO): Rural Development Minister, Metsubo Jamir-i BDO tem dang pei mapa lezmükba tesem nung alitsü aser pei pei district nung office attendance jungdaksütsü atema ayongzüker.

Hokolbarnü Niathu Resort nung Project Directors (PDs) & Block Development Officers (BDOs) Conference 2020-2021 alidang pai iba tayongzüker agütsü.

"Iba financial year tembangtsü atema ita ana dang anünga lir, anungji ketdangsürtemi mapa metembang aliba ajak tembangtsüba aser taruba financial

year atema sentong renemtsüla" ta Minister Metsubo-isa ashi.

"Senotsü magütsüra Department-i mapa kecha meinyaktetsü. BDO o MIS nungi release process tenzüker. Maneni, PDs aser BDO temi tang teinyakdak mapa ajak tembangtsü aser mapang shitak nung upload asütsüla" ta paisa metetdaksü.

Rural Development Department-i mapa kanga junga inyaka arur aser iba ajanga national aser state level nunga sempet balala agizükogo, ta Metsubo-isa shisem.

"Yaküm asenoki küm tamajung ka ajuruogo aser tetsükdaksü

COVID-19 Nagaland: Nisung 2 dak putet; 5 taneptsü angu

Dimapur, January 22 (TYO): Hokolbarnü Nagaland nung nisung 2 dak COVID-19 aliba puteta nisung ajak agi 12,072 kümogo aser nisung 5 taneptsü angu.

"Dimapur aser Kohima nung nisung kaka dak COVID-19 aliba putet. Külén, Dimapur nungi nisung 2 aser Kohima nungi nisung 3 taneptsü nguogo" ta Health & Family Welfare Director, Dr. Denis Hangsing-i ashi.

Nagaland nung COVID-19 puteter nisung 88 süogo aser nisung 142 tanga state temi ogo, ta paisa metetdaksü.

District balala nung COVID-19

alirtem putetba: Dimapur (6,462), Kohima (3,777), Mon (605), Peren (504), Tuensang (245), Mokokchung (191), Zunheboto (142), Phek (47), Kiphire (41), Wokha (39) aser Longleng (19).

Nisung 12,072 rongnung Traced Contacts 4,976, armed forces personnel 4,667, tanga state tem nungi arur 1,857 aser Frontline Workers 572 lir, ta Dr Hangsing-isa ashi.

District balala nung anepalurtem: Kohima (50), Dimapur (42), Mokokchung (11) aser Mon (1).

Tang anepalurtem rongnung nisung 15 dak shirangba yimya

aika ajurua mapa inyak" ta Commissioner & secretary, RD, Neposo Theluo, IAS-ia ashi.

Covid wara ajanga mapa aika nung kongshi aser iba ajanga imlaba ama geo-tagging aser village inspection meinyaktet. Anungji, ketdangsürtemi senotsü timi amshitsü aser timtem talila bener marutsü merangtsüla" ta Neposo Theluo-isa metetdaksü.

"Khuret ajurubatem ministry dangi abentsü atema ketdangsürtemi department nem osang agütsütsü ayongzüker" ta Theluo-isa ashi.

Iba sentong nung Pradhan Mantri Awaas Yojana (PMAY-G), Gram Panchayat Development Plan (GPDP), RGSA and e-gram Swaraj, Nagaland State Rural Livelihood Mission (NSRLM), Grant-in-Aid, VDB Welfare Fund, Micro Finance & UC, Fifteenth Finance Commission Grant to RLB & Rurban, MGNREGA aser Sansad Adarsh Gram Yojana (SAGY) onüktem benoka lemsatet.

Sentong nung mendenji RD Director, Imnuksihla liasü aser Addl. Director, RD, Liboni Humtsoe-i anküp tepela o jembi.

terara lir aser 2 oxygen agidar. Nisung 87 dakbo shirangba yimya kecha mali" ta paisa shisem.

Taneptsü angurtem: Dimapur (6,285), Kohima (3,666), Mon (593), Peren (504), Tuensang (243), Mokokchung (171), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,23,806 tendangogo. RT-PCR ajanga sample 72,945, TrueNat ajanga sample 37,038 aser Rapid Antigen Test ajanga sample 13,823 tendang" ta Hokolbarnü COVID-19 bulletin nung metetdaksü.

Police-i Tezpur aser Guwahati nung AASU sentongtem noktang

Guwahati, January 22 (Agencies): Assam kübok Tezpur nung Hokolbarnü police-i AASU züngsemtem dak süng agi azük.

AASU züngsem meyirjang aikati Citizenship Amendment Act (CAA) anema milen amer lungkak aitba sentong ka agidang iba ya atalok.

Police-i tashiyim mapa inyakba aija AASU-i Honibarnü Sonitpur ajunga mokdangtsü ayongzüker.

AASU-i tanü nungi tenzüker anogo asemnü state ajungalen Anti-Citizenship Amendment Act (CAA) sentongtem agütsü tenzüker.

Guwahati nung aliba Swahid Nyas (AASU headquarters) nungi AASU züngsemtemi milen amer lungkak aitba sentong ka tenzük saka police-i parnok tim nung noktang.

Iba mapang AASU Chief

Advisor Samujjal Bhattacharya aser President Dipanka Nath nati anir tanishirtemi police den raratep.

"Onoki ozüngi melaba ama torch light rally agiba anendaktsütsü atema sorkari police nem tetuyuba agütsü. BJP sorkari tashiyim amshia timi lungkak aitba temeten agiener" ta ASSUPresident Dipanka Nath-i ashi.

"Prime Minister Narendra Modi aser Home Minister Amit Shah nati yakta Assam semdangtsü. Onoki Centre dang CAA anema maneni lungkak aittsü ta nenshia metetdaksür. Sorkari CAA magien tashi onoki anema noktaksü" ta paisa ashi.

"BJP-i aniba sorkari timi lungkak aitba sentong noktangba aitsür," ta AASU Chief Advisor Samujjal Bhattacharya-ia ashi.

"Sonowal ya AASU ajanga anitetba nisung ka lir aser pai iba sentong noktangba ya maaksü lir" ta Bhattacharya-isa Chief Minister Sarbananda Sonowal aitsü.

BJP sorkari lisopur Assamese nunger temetentem kümzüka ayutsü atema meinyaker. Clause 6 committee-i osang agütsür joko küm ka tema süia arur saka Centre aser state sorkaritemi iba ya mapa küma meinyaker" ta Bhattacharya-isa metetdaksü.

Honibarnü Sivasagar nung PM Modi-i public sentong ka shilem agütsü aser iba tesem nung taonung nisung meyirjang aikati milen amer adenshi.

Asüng AASU züngsem ajaki CAA anema badge tanak khaloker lungkak aittsü sentong renema lir.

Namri Nchang-i Bongkolong Community Hall semzüksü



Dimapur, Aenjeti/January 22 (TYO): Ahthibung Sub-Division kübok Bongkolong Village Community Hall semzükba sentong ka January 22, 2021 nü Bongkolong Village Community Hall nung agia liasü. Iba Community Hall ya MGNREGA 2019-2020 kübok yanglu aser iba ki sayaba sentong nung Advisor, Water Resources, Namri Nchang ya tongti tesemdang ama arua dena liasü.

Iba sentong nung jembiba mapang Namri Nchang-i state kumteter terenlok mapa balala indang jembia aser tang tashinung nüburtemi kechi tajangzük sa ngua ali, ta asüba indang yangji aliba nüburtem den

lemsatepa liasü.

Pai nüburtem dang tesüiba mapang bilemteta tajung atema lungjemtsü ayongzük. Paisa kaketshir aser nübur dang kumdangshia mangatet alir nem angatetdaksütsü ajungshi aser olulu prokshiba nungi pila alitsü aser tesunep-telungjem atema inyaksü ayongzük liasü.

BYSU aser Bongkolong Village Council ajanga memorandum ka Advisor nem iba sentong nung agütsü.

Iba sentong metenzükang Advisor Namri Nchang-i Community Hall tasenba semzüksü aser Christian Church Bongkolong Elder, L.K Kholhou-i iba ki meshiteta sarasademja liasü.

Iba sentong ya Matthew Hangsing aser Kimhoivah Hangsing nati anir agi, kong BDO RD Block Ahthibung, Noklenzenba Jamir-i tarur pela agizükba o jembia aser Bongkolong Village Council Chairman, Lalkholen Hangsing-i tepela ankep o jembia liasü.

Iba sentong nung Advisor NDPP Bongkolong Unit, Songsei Hangsing, ADC Jalukie, Dr. Tinojongshi Chang aser Project Director DRDA Peren, Azenuo Pienyü nungertemia o tatsütsü jembia aser Veineichin Hangsing-i temeja ken ka aten. Maneni Bongkolong yimtsüng nung aliba lanur aser kaketshirtemi sobaliba tsüngsang ya sayua liasü.

Merangkong Senso Telongjem Tuli ajanga pelaba lemsatep

Dimapur, Aenjeti/January 22 (TYO): Tsüngremer kümsük, January 15, 2021 anogo nung Merangkong Senso Telongjem Tulu (MSTT) küm tenem ajungba Hon Jubilee-mong temoatsü tulu nung mongtetba asoshi Tsüngrem tenüng asanger, ta MSTT sangdong ka ajanga ashi.

Iba Hon Jubilee asoshi kija, kibong aser lokti shirnokisa rongsen, shisatsü, nübu aser sarasadem agi yaritepogo, nenok ajak dang MSTT ajanga pelaba lemsateper. Talisa iba Jubilee mong nung, tongti tesemdang T. Amenba Yaden, MLA, 21 Tuli Assembly Constituency, tongti o jembir

Rev. Toshimeren, Imsongmeren A.D.C Tuli aser Merangkong Medemsanger Putu, nenok arua iba Jubilee mera ketdaksü nung Tuli nung aliba Merangkong Sensosanger ajak tenüng nung tepela tulu lemsateper, ta MSTT tir Er. Lanukaba B aser tezülur K. Imlitemjen Jamir nati sangdong ka ajanga ashi.

Mon nung PMU indang State Co-ordinator-i senden ka ayongzük



Dimapur, Aenjeti/January 22 (TYO): Ministry of Social Justice and Empowerment, Government of India nungi PMU indang State Co-ordinator, Dr. Pankaj Gupta-i January 20 & 21, 2021 anogotem nung Mon District semdanga January 21, 2021 nü District administration aser Nasha Mukht Bharat campaign indang Master Volunteer tem den Deputy Commissioner, Mon indang Conference Hall nung senden ka mena liasü.

Iba senden nung Ilika Zhimomi, SDO (Civil) Mon ajanga Dr. Pankaj Gupta aser Wango Konyak Assistant Director, Directorate of Social

Welfare aser Master Volunteers tem pelashishia agizük liasü. Lai senden nung Nasha Mukht Bharat kübok sentong balala inyaksü yanglua aliba indang lemsatep. Temesepba miim mozü achiba/ajemba agi lokti menentsüba aser temang nung timtem balala ajuruba indang nüburtem nem tali metetjemdaksütsü nükjidong nung sentongtem renema liasü. Laisa district nung maparen balala inyakba indang power point presentation agütsü.

Iba sentong nung jembiba mapang Dr. Pankaj-i linük nung temesepba miim mozü achirtem azüoktsü asoshi Master

Volunteer temi tongtipang shilem agiba indang jembo.

Pai Master Volunteer tem dang maneni timtem-tetsükdaksü ajangshiba indang lemsateptsü ajungshi aser tensa den apet maparen inyaksü ajungshi.

Temesepba miim mozü amshiba den raraba nung district administration aser Department-i akokba nung yaritsü, ta Wango Konyak-i ashi. Pai district nung sentong balala ayongzük inyakba atema tenüngsang agütsü aser maneni arogo aser civil society tem dang nüburtem item chiyongtsü nungi pila alitsü asoshi sentong balala yanglua agitsü ayongzük liasü.

DC Kohima ajanga jaokba aser Car Pass indang metetdaksü

Dimapur, Aenjeti/January 22 (TYO): Deputy Commissioner, Kohima indang office nungi sangdong ka ajanga Head of Departments (HoDs), Invitees aser Awardees ajak dang 72 buba Republic Day anogomung atema invitation Card aser Car Pass ya Deputy Commissioner, Kohima indang Office nungi January 23, 2021 nü anepdang 11:00 ako nungi nikongdang 1:00 ako tsüngta aser January 25, 2021 nü office lapoka aliba mapang arua meshitsü metetdaksü.

[7:10 PM, 1/22/2021] Jungshi Tyy: Directorate of School Education ajanga metetdaksür

Dimapur, Aenjeti/January

22 (TYO): Directorate of School Education, Nagaland Online Evaluation Phases I, II & III nung mezüngbuba, tanabuba aser tasembuba jenjang ngutetba kaketshir indang School Head tem dang January 25, 2021 nü nungi tenzüka Directorate of School Education, Kohima (Room No.411) nungi office mapang Certificate of Appreciation aser Cash Awards tem meshitsü metetdaksüogo.

Keketshir/tsurabur mesüra kaketshir tenüng nung nisung kari School Heads nungi agütsüba Authorization Letter bener arua Certificate aser Cash Awards ya agizükttetsü akok, ta sangdong ajangasa metetdaksü.

DC Mokokchung ajanga Republic Day atema metetdaksür

Dimapur, Aenjeti/January 22 (TYO): Aruya aliba January 26, 2021 nü Republic Day anogomung sentong nung Mokokchung jila kübok inyakba sorkar tenzüker ajunga arua adentsüla, ta Deputy Commissioner, Mokokchung, Limawabang Jamir-i sangdong ka nung metetdaksü. Iba sentong ya Imkongmeren Sports Complex nung akhi ama anepdang 8:40 ako nungi tenzüksü.

Ungma, Mokokchung, Chuchuyimpang aser Khensa yimtem nung aliba village council aser GB union tem aser Mokokchung jila nung aliba GB tem aser Mokokchung jila kübok ward 18 nung ketdangsür

aser nüburtem danga taküm Republic Day sentong ya Imkongmeren Sports Complex, Mokokchung nung teti ama anepdang 8:40 ako nungi tenzüksü, ta metetdaksüogo.

Tang COVID-19 tashidak wara agi bena arutsüba tensa mechi aser lokti tulu madenshitsü asoshi lokti tentet ajunga nungi iba 72 buba Republic Day anogomung nung adentsü asoshi nisung timba agi pongu (5) jaoker, ta sangdong ajangasa ashi.

Maneni iba sentong nung adener ajaki face mask agitsü aser COVID-19 dak sendakba guidelines tem sülen anidaksüla, ta metetdaksü.

Phek Deputy Commissioner tejenba den tepila sentong agi

Dimapur, Aenjeti/January 22 (TYO): Deputy Commissioner, Phek, Sachin Jaswal, IAS atema tepila sentong ya DC indang Conference Hall nung agia liasü, kong Phek district nung sorkar ketdangsür, lokti balala lenir aser temolungertem arua dena liasü.

Iba sentong ya Phek SDO (Civil) N. Bhavani Sri, IAS menden sür agi, aser Deputy Commissioner mapa yutsür aosangi state aser talisa Phek District ajungtsü atema mapa jenti inyakogo, ta lai ashi.

Iba sentong nung Chozuba ADC, Theodore Yanthan; Imliakum Sanglir, EAC; Vesupra Kezo, NPS, Superintendent of

Police, Phek; Shiekhozo Rhakho, Asst. Controller, LM&CP, Phek aser T. Thutu Thurr, LDA nungertemi o tatsütsü jembia liasü.

Phek indang Deputy Commissioner mapa yutsüsang Sachin Jaswal-i Phek district nung aliba nüburtem aser district ketdangsürtemi pa yariba aser pa den lenmang balala nung amalitep akaba asoshi pelaba lemsatep.

Phek district ya ni kodanga mamadoktsü aser tarutsü anogotem nunga kasa yariteptsü ajungshir, ta pai ashi.

Paisa nüburtem ajangzüksü asoshi tajungtiba nung yaritsü molunga lir, ta shia liasü.

Nisung 70 Arangtet Tatidang zulu

Dimapur, Jan. 22 (TYO) : January 20-22, 2021 tashi centre asem nung Ao Arangtet Tatidang takok ngua agiogo. Iba tatidang ya Ao Senden Literature Board (ASLB) ajanga achaayanga agir.

Takum Arangtet class balala (PU, BA, MA) nung tatidang agutsur nisung ajak agi Mokokgchung centre nung 57,

Dimapur Centre nung 7 aser Kohima centre nung 6 liasu. Tang ya college aser university balala online exam den tsuktepba ajanga kaketshir nisung 12 shi AT magutsutet.

Kum shia AT ya anabenren agir, ibaji kum tetenzuk nung khen aser kum tiyong nung khen ta agia arudar.



Meghalaya Chief Minister Conrad Sangma-i Hokolbarnü India nung road arch bridge talangtiba lapoktsüba angur. East Khasi Hills district kübok Sohbar nung Wahrew Bridge ya Rs 49.395 crore endoka yangluogo. Ministry of Development of North East Region (DoNER) indang Non-Lapsable Central Pool of Resources (NLCPR) kübok iba apu ya yanglu. (Shillong, January 22)

IPFT-i anogo pungububa 'Tipraland' atema sentong agiogo

Agartala, January 22
(Agencies): Tripura nung BJP den yariteper Indigenous People's Front of Tripura (IPFT)-i Tipraland State balaka tentetsü atema tuluba lungkak aittsü tenzükogo.

Hokolbarnü IPFT-i Tripura Tribal Areas Autonomous District Council (TTAADC) kübok Golaghati tesem nungi yimdong sema lungkak aittsü tenzük. Parnoki Sepahijala district kübok Dhanpur tesem tongogo.

IPFT-i tanü agi anogo pungububa lungkak aiter aser TTAADC kübok tesem ajunga sema senzüksü.

"Anogoshia tesem balala nung sentong agiyonga arudang

nübertemi Tipraland balaka tentetsü atema onok den adener" ta IPFT spokesman Shukla Charan Noatia-i ashi.

Tripura High Court-i state sorkar dang May 17 matongdang TTAADC indang election agitsü tetuyuba agüja lir.

TTAADC sorkar indang kümsükji yaküm May 17 nü tembanga liasü. Ajisüaka, COVID-19 wara ajanga council indang election magitet.

Tripura Governor-i ita 6 atema TTAADC ketdangsütsü tashi agütsü aser ibaji ano November 17 nü ita trok atema atsülangtsü.

TTAADC indang election magiba atema Tripura nung

opposition party temi aitsür.

TTAADC ya züngsem 30 agi akümba Council-i ketdangsüa arur.

Züngsem 30 nungi parnok 28 vote enokja shimer aser nisung 2 Governor-i shimer.

TTAADC kübok tesem timbaka nung CPI-M tashi lir. CPI-M-i tesüiba küm 15 tashi TTAADC yimsü süa aruogo. Iba mapang Tripura nung tanga party temi menden ka nung danga takok menguteti liasü.

Tripura nung political party ajaki Tripura Tribal Areas Autonomous District Council (TTAADC) election atema nüboyimba maparen tenzükä inyakdar.

Tinsukia nung Laika aser Dodhia yimertem lungkak ait

Dibrugarh, January 22, 2021

(Agencies): Dibru Saikhowa National Park kübok Laika aser Dodhia yimertemi Tinsukia Deputy Commissioner Office kima lungkak ait.

Lungkak aiter temi placard aser banner tem amer parnok nem tim teyari agütsütsü asoshi Tinsukia yimdong sema senzü.

Lungkak aiterem DC office telungi maitdaksütsü asoshi police temi atsüdang aliba atsü nungboka aitsü merangba mapang parnoki police den raratep. Lungkak aiter kari Tinsukia DC office telungi aitsü atema atsüdangba raksaja liasü.

"Onok indang rehabilitation maparen ano metenzüksü. Laika aser Dodhia yimtsüng kibong 1480 tashi rehabilitation atema tesüiba anogo ishika tejakdang nungi onok lungkak aiter. Tinsukia DC office anasa asükba arema yimertem camp tilala yanglur anenzüka lir. Yimertem nem takaratiba nung teyari agütsütsü asoshi onoki akhangar," ta Laika aser Dodhia Rehabilitation Committee züngsem, Apio Taid-i ashi.

Tinsukia tesem nung Asom Jatiya Parishad (AJP) president Lurin Jyoti Gogoi-i Laika aser Dodhia yimertem semdang aser parnok nem teyari ajak agütsütsü asoshi pai nangzük.

Takam Mising Parin Kebang (TMPK) Tinsukia assistant general secretary Ajay Doley-i, "Laika aser Dodhia yimertem atema tang tashi nung sorkari kecha meinyaksü. Tesüiba ita ka tejakdang nungi nüburtem DC office anasa camp tem nung teyari atema takhangba agüja longkak aitdang kanga timtemdar."

"Nübur nem teyari agütsütsü asoshi onoki January 31, 2021 tashi anogo züngzüksü. Iba anogo tashi nung onoki akhangba mataloktsüra, Dibru-Saikhowa National Park nung nüburtem parnok mulungka agi alitsü," ta pai ashi.

Iba yimtsüng ana, koba

Dibru-Saikhowa National Park telung nung lir, parnok kibong iba tesem nung lia liasü, shirnok 1950 küm adokba menoknok ajanga iba tesem toktsür aotsüsa aküm.

Laika ya Tinsukia district aser Dodhia ya Dibrugarh district kübok aiter.

Item yimtsüng nung alirtem, shirnok indigenous Mising tribe nung dena lir, parnok timbaka Dhemaji aser Dibrugarh district nungi toktsür aoertem dang lir aser tesüiba küm 70 tejakdang nungi parnok ya arembok yimtsüng ana nung jenoka lia aru.

Ajisüaka, India indang Wildlife Protection Act of 1972 ajanga National Park telungtet nung nisung alitsü asoshi nokdang asünung, yimtsüng ana nung terenlok maparen kecha meinyaki lir.

Laika aser Dodhia yimtsüng nung kibongtem nem teyari agütsütsü asoshi mapatong tajung ka atongtettsü atema December 30, 2020 nü chief minister Sarbananda Sonowal-i committee ka tenzüksü.

Chief minister Sonowal-i, January 31, 2021 nü tashi nung item kibongtem nem teti atema talidak bushitsütsü asoshi environment & forest & revenue department dang mepishiogo.

Dodhia nung alirtem lidaksütsü atema, Sorkari Harmoti range kübok Lakhimpur indang Adhkhona-Adielani tesem lemozüksü aser Laikia yimertem alitsü atema Namphai reserve forest nung sorkari ali agütsüogo.

Lakhimpur aser Tinsukia district nung Laikia aser Dodhia yimertem atema state sorkar asalentong ya Mising community indang kaketshir tentet - TMPK-i magizük.

Kasa mapang, Laika aser Dodhia yimertem nem talidak agütsütsü asoshi Guwahati nung Asom Jatiya Parishad (AJP)-ia yimdong nung mener longkak ait.

April 14 sülen Meghalaya board exam agitsü

Shillong, January 22, 2021

(Agencies): Meghalaya board examination April 14, 2021 sülen agitsü ta education minister Lakhmen Rymbui-i ashi.

Social media ajanga April 6 nungi Meghalaya board examinations tenzüksü ta olulu osangtem prokba dak sendakba nung Minister Rymbui-i osang jangjatsüogo.

"April 14 sülen board examinations agitsü onoki telemtetba agiogo. Iba board examinations atema anogo yakta sangdongtsü" ta minister-i ashi.

Taoba mapang, Meghalaya board examinations - Secondary School Leaving Certificate aser Higher Secondary School Leaving Certificate ya March

ita agiadoker.

Iba board examinations ya Meghalaya Board of School Education ajanga ketdangsüa agir. Ajisüaka, tang Covid-19 tensa süngjema makümba ajanga taküm iba examinations atema anogo melenshitsür.

Taoba küm (2020) linük ajunga nung lockdown ajanga class tem junga magitettsüsa akümba ajanga kaketshirtem kakat shisatsü bushiba nung timtem/khuret talirabo magidaksütsü atema State Education Department-i syllabus ajemtsüogo.

December 2020 nungi board indang official website aser office nung online aser offline ajanga Application aser iba dak sendakbatem agüja arudar.



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**



**Tetsür anema tashiyim amshiba, taküm
raksatsüba aser shibelenba anema nokdakti
aser tetsür kümzüka aliba tesem
kümdaksütsü merangdi.**



TIR YIMYIM YIMOBILEM (EDITORIAL)

DIMAPUR KÜPTOKNÜ, AENJETI (JANUARY) 23, 2021

NÜBORTEM KAZÜDAK

Kazüba tetezü mapa meinyaki temang anisüngzüka aser temulung peladakja amongba ta angatettsüa akok. Ano, kazüba ta asübaji tanga ojang nungbo südoksünema ta jembir, anungji kazüa mesüra südoksünema amongdak tesemji kazüdak mesüra südoksünemda asütsü. Ajisüaka, tanü yangi lemsatepnüba yabo kazüa amongbasa asüyonga kidang amongba mesüra kima yimdong nung kazüa senzüba ya masü saka yimtak yimtsüng nung asüyonga mesüra town nung asüyonga tanurtem pelatepa kazüdak, aiür asangur nüknürartem ajurutepe amongdak aser tantsür tamburtem mopong tajung chia medemertem den otsü alonga kazüdak, moapu nung tesem tajung mesemteta ayutsü nüngdakba indang jembir. English nungbo Children's Park ta mesüra Public Park ta ajaba asenoki angashir aser tesem kar nungbo yanglua angutsü. Atangji, tangar tashitemetettertem lima nungbo yim akümdang mepu aser kiyong shia nung tamasa nübortem kazüdak asütsü moapu tesadem tuluka shiteta ayur aser yim küma mepu aser kiyong balala mesemteter külen item tesemtemji yimkong südoksünema kazüdak tesem temenungratsüka yanglur. Iba amaji nübortem moapu nung kazüdak yanglua ayutsübaji ajaki kanga temulung agüja inyakba agi, tangalenbo kibong ishika süli Park ka, kibong ishika süli Park ka ta mepu shia nung nübortem mapang endoka aser mopong tajung chia pelatepa otsü atonga kazüdak yanglua angutsü. Ajisüaka, asen sobaliba nungbo yim akümdang ariju asütsü atema kimong tama yateta ayutsü aser tzübo mesemtsü ta asüba mapatem dak alaka, nübortem südoksünema kazüdak mesüra amongdak moapu nung tesem tajung mesemteta ayuba otsübo mali. Ashiko, akhi asen otsüla oboula nunger mapang nungbo mapa inyaksü aser arrlepi aotsü bilemba dak alaka kazüa amongtsübo tebilema mebilemka südi. Aji oda, asenok alidak pei pei yim, town aser kiyong nung nübortem kazüdak 'Public park' yanglutsüba yabo asenok asoshi tangatetba aser sobaliba tasen lir. Iba jagi tanü putu nungang asenok alidak Park-sa mesüaka football ground kabo tua ayur aser tanü asüng yim tasen akümdanga, tamasa tenla ki, yimkong ki aser football ground yanglutsü asoshiibo tesem tesadem repranger balaka shiteta ayur, Ajisüaka, tanü tashi asenok kolok nung asen alidak tanur tain ajak mopong tajung chia kazüdak tesem tajung ka mesemteta ayutsübaji tebilema mebilemer. Joko, tanübo iba nüngdakji reprangteta asenoka asenok alidak yimten aser lokti tentetemi temulung agüja nübortem mopong chia kazüdak tesem kakabo mesemteta ayutsübaji kanga nüngdaka kümogo. Iba ama mapang ka nung, tang Horticulture department-i Dimapur nung Green Park tajungba küma yanglushir nübortem südoksünema kazüdak tesem tajung lapoktsübaji, Dimapur nung alirtem asoshi dang masü saka Nagaland asoshi osang tajung ka asütsü. Iba amaji Kohima aser Mokochung ama nunga Park yangluba osang angashia pelar. Kasaji, ano Dimapur nungsa Hotel Saramati anasa Ao Kaketshir Telongjem Dimapur-i parnok telongjem Hon jubilee mong amongba tenüng nung Park tajung ka yangluja lir. Atangji, tanü putu nungbo nübortem kazüdak yanglubaji kazüdak dangbo masü saka yangji nisung karbo chiyongtsü aser süngo ayokdak lapoka senotsü aatsü maongka angur aser yangji arua kazürtema jangratema amonger aser iba jagi alima topur jungdaksür. Asenoki angatettsüba kaji, asen alidak asenoka aser asen chinurtema tango sadoka aser temang arakzüka asayadak aser kazüdak pei kiyong nung tesem kabosa alitsü nüngdaker, yangji parnok ajuruteptsü aser metetteptsü. Tanübo asenoki moapu nung aiür asangurtem ajurutepe otsü atongdak tesem tilakata mesemteta meyutsüba agi, parnok kazüdak maka kidangang mesüra arem nungang shingai mangudak kazütsüsa akümer. Iba jagi lanurtem aika taküm raksar aser medemertem ajurutepe shisatsü tajung angazükdak maka akümer. Kazüdak ta asüandangbo azümesenertem asoshi dang amai bilemer saka mapa kanga inyaker, lesson kanga bushir aser tantsür tambur kümer külen azüngmeyakertem asoshi kiyong shia kazüdak moapu tajung mesemteta ayutsü nüngdaker.

OLEMSABANG

SHIN O ATALOKBA AGI ALIMA TATEM NOKSA SAYUR

~ A.Imdong Jamir, Sungkomen

Isaia ainker shibai kibuba Yisu arutsü küm noklang 8 shi lia shien, shidak atalokogo. Pa sülen Yerimia ainker-i anir ainker tila parnok 12-i alima tempangtsü indang shiener parnok oadokogo tesüsa kibuba yisui shiener oadokogo. Iba sülen Isakar semchir, Nostradamus shibai küm noklang 500 lia shien metitemi asenok tenük tenarong agi angashia, ngua, ataloka arudaki ya kibuba Tsüngrem sendong tulu asenok dang sayur ta mtetedi.

1. Yerimiai Israel kin atema shienba:

Oh! kü nübor jala na anemsü abenang, ne sasaa aut nung longzüa chiguang, nai mang yimang, ajaso chir asoshi ama jembang kechiyong asen madak tesamatsüsang ajungbena arutsü. Yer. 6:26

2. Amos aikner-i Israel tia asoshi shienba

Kü nübor Israel asoshi, tatepang aruogo ni joko parnok anasa mesüitsü. Iba anogo nung tekülemdak ki nung kentenbaji asatepba ola akümtsü ta kibuba Tsüngremi ashir, tasü mang jendi alitsü, tesem aisü nung parnok ola madoki merepshitsü. Amos 8:2(c)

3. Tatem anogo mapang Israel tia:

Yamai temeranger Kibubai ashir, item anogo nung ya oda ataloktsü, kintem oshi ajak nisung ter-i Yihuda nunger ka dak su nung soter ashitsü onok nenok den aotsü, kechiyong Tsüngrem nenok den lir, ta onoki angashiogo. Zek 8:23

4. Badia ainker ajanga alima tamarener temdang ashir:

Nai mongzü ama talang tuaka aser ne tesepepetinu rongnung yangluaka ni yangnungjagi na anir alutsü ta kibubai ashir. Obadia 1:4

5. Nostradamus-i küm noklang 5 (pongu) shia lia New York asoshi shien:

Middle East nungi ainker ka adoktsü. Bin Laden Sept.11, 2001 New York yimti World Trade Centre lungki tulu poksaja nisung meyirjang 3 (asem) tepset. Bin Laden-i ashi "fighting is a part of our religion" rarabaji asen tamangba yimsü nung shilem ka.

6. Paisa maneni Indira Gandhi asoshi shinba jendoka aliba tamarentsürlaji tanaben yimsüsüba mendeni arua amentsü. La arishi küm 70 ajungtsü küm 3 (asem) lia tepsettsü. La Oct. 31 1984 lar kilempok nung asü.

7. Tsüngremi jembir:

Tanurtem tatem anogo tongogo. Khrista anemer arudagi ta nenoki angashiba ama tang joko khrista anemertem aika adokogo aji agi tatem mapangji tongdaki ta asenoki meteter. 1 Yoh.2:18

8. Yisui ashir:

Sannükla, sannükertem temeshi langpang nungi tejen o tejembi. Tasen o jembiang. Maka-mait aremang tanüla nangri kangang. Tasü itang, nungsen aremang, mojing yipro arudar, nenok asoshi anjung tenari. Ayatrem anokpang yimyim ayima sarasademang. Mesüra nenok kotaki marutettsü ta yisui ashir. Amen

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantemi alima nung lajartem yaritsü atema tenangzükba agir

Aenjeti/January 22, 2021: Alima nung lajartem yaritsü atema Khristan organizations aser nija 240-i tenangzükba ka nung sign süogo.

Global Church Pledge nung sign asürtem rongnung Bishop of Durham, Rt Rev. Paul Butler aser Kerith Community Arogo nung pastor, Simon Benham nunger densema lir.

Global Church Pledge nungji yamai zülua lir, "Tanurtem aser lanurtem aintsü atema temeim aser tekümpzükba nüngdaker, ibayongji Tsüngremi kibongtem yanglu ta onoki amanger. Anungji alima nung timtem tia nung aliba tanurtem tenüng nung onoki nungita yaritsü nangzüker, koba ajanga kibongtem tashi itdaktsütsü aser parnok timtem anema raratsü."

US nung amenoka aliba organization- Faith to Action Initiative-i iba tenangzükba ya yanglu, koba ajanga kibong nung chimurtem anepaluba ama lajartem-a anepalutsü. Iba ya Better Care Network ajanga inyaker aser iba mapatong teloktep nung USAID aser UNICEF densema lir.

Iba mapatong ya tangbo philanthropic organisations-Tides Network-i pusema non-profit organizations aser social-impact organizations nem fund agütsür; tesüiba mapangtem nunga philanthropists- George Soros, Bill Gates aser eBay tenzüksang, Pierre Omidyar nungeria iba mapatong nungita liasü.

Putir Paul Butler-i, "Alima nung tanurtem aintsü atema tesem tajungtibaji kibong lir. Anungji asenoki kibongtem dang lajartem institutional care nung yutsüba dang nungibo lajartem pei chir küma agir (adopt) anepalutsü atema ajungshitsü nüngdak. Iba ya alima nung linük ajak asoshi tongtimbang onük ka lir," ta ashi.

Iba mapatong nung shilem agitsü atema World Vision, Evangelical Alliance UK aser Care for Children densema Khristan Organisations aikati sign süogo. Parnoki Khristan kibongtem dang lajartem nem kibong temeim agüja anepalutsü atema ajungshitsü.

Fostering & adoption charity Home for Good nung chief

executive, Tania Bright-i sangdong ka ajanga, "Home for Good tenüng nung ni Global Church Pledge nung sign asüba atema kanga pelar, kechiyong tanurtemji temeim aliba kibongtem nung anepalua intettsü nüngdak ta bilemer," ta metetdaktsü.

Tang alima tesem balala nung tanur million 2.7 shi Residential care homes nung lidar (UNICEF-i asadangtetba). Ajisüaka tesüiba küm ishika tsüngda institutional care homes nung aliba ajanga tanurtem junga merenlokba tebilemtsü akar.

Ibayongji 2019 küm UN General Assembly nung convention ka ayongzüka Rights of the Child onük nung senden mena liasü.

Childcare-reform advocate aser ReRoot Africa co-founder, Ruth Wacuka-i, "Tanur ka orphanage nung intetbaji ni ajangshia lir; tanurtem renloktsü atema institutional care ji tajungtibabo masü. Arogotem longjemtsü atema Global Church Pledge ya mera tuluka agiba lir," ta ashi.

TDP Tir Naidu-i Khristantem anema jembiba aitsür: Khristan lenirtem

January 22, 2021: Bodhbarnü All India Christian Youth Associations-i ayongzükba senden ka nung TDP national Tir aser taoba mapang Andhra Pradesh Chief Minister, N. Chandrababu Naidu-i Khristantem melung yirudaktsüsa o jembiba atema Khristan lenirtemi pa aitsüogo.

Naidu den mapang talangka inyaksema arusang aser Anglo Indian quota kübok taoba mapang

MLA, Philip. C. Tochar-i, "Ni party (TDP) toktsüba mapang nungi ni tepsettsü atema phone ajanga ni amokmerener. Ni ibaji DGP nem-a metetdaktsüogo," ta ashi.

Naidu-i Khristantem anema jembiba atema Mongolbarnü Philip C Tocher-i TDP minority cell nungi anenba sülen Bodhbarnüa Andhra Pradesh nung district 13 nungi TDP Christian cells Vijayawada nung adenshir party nungi külemi anena liasü.

TDP state Tir, Kinjarapu Atchannaidu dangi züluba shidi nung Tocher-i, "Naidu-i ajungbena Khristantem anema jembiba atema ni TDP active membership nungi anenba nü nem metetdaktsür," ta shia lir.

Tochar-isa, Vizianagaram district kübok Ramateertham nung Rama süngyanglu raksatsüba sülen Naidu-i Khristantem anema o jembiba atema melung yirur, ta ashi.

Naidu-i jembiba o ya tamangba yimsü balala tsüngda rara adokdaktsütsü nükjidong nung jembiba o lir, ta Philip-i ashi.

"Iba tatalokbaji (Hindu nunger süngyanglu raksatsüba) Khristantem den sendaktepa mali, ajisüaka tamangba yimsü tsüngda rara adokdaktsütsü atema Naidu-i jembii. Iba tatalokba denji Khristan yimsü koma sendaktepa lir? Kechiba pai iba onük nung Khristantem aser Laishiba tetshia jembir?" ta pai asüngdang.

TDP Christian Cell,

Praveen-i, Naidu-i jembiba o atema state nung Khristan ajak jashir, ta ashi.

State nung Khristantemi kangshia tamangba yimsü meyipdaktsür, ta aitsüba dak sendakba nung Praveen-i, "Ita asem kinü tanur ka nem chiyungtsü kangshia chidaktsütsüa tasak, anungji kodaser tain ka kangshia tamangba yimsü meyipdaktsütettsü?" ta ashi.

Dalit Khristan lenir, Raja Sundar Babu-ia, kuli makai Naidu-i Khristantem anema jembiba atema pa aputsüla; süngyanglu raksatsübaji Naidu mapa lir, kechiyong pai sorkar anokshidaktsüner, ta ashi.

Immanuel Ministries nung Tir, B. Ravi Prakash-i, tamangba yimsü balala ajak tesünep nung alir, ajisüaka Naidu-i telemsa adokdaktsünüa jembir, ta ashi.

Khristantem melung yirutsütsüsa Naidu-i o jembiba anema Khristantemi jila nung motorcycle rally ka ayongzüka agia liasü.

Telangana nung Hindu nunger telok kati Tenla ki tesüdak raksatsü

January 22, 2021: India kübok Telangana state nung Hindu yimsü alia amanger telok kati Tenla ki tesüdak ka raksatsüogo, ta International Christian Concern-i metetdaktsü.

Iba Arogo nungji pastor-i, Khristantem atema Tenla ki asütsü asoshi pai küm aika tejaklen mangdang yua liasü, ajisüaka tang Tenla ki raksatsüba ajanga amajok kümogo, ta ashi.

January 20, 2021 nü Bura Venakanna leniba nung Hindu nunger telok ka Tenla ki asüba tesem jagi aruba sülen Tenla ki asürtem amokmeren, aser Tenla

ki tongshi den jaratem raksaja liasü.

Hindu nunger tekülem ki anasa Khristantemi Tenla ki yangluba agi Hindu nungertemji mepelai liasü, ta osang angazüker.

International Christian Concern (ICC) den jembidang Pastor Mohd Afzal-i, "Tenla ki tesüdak raksatsüba ajanga sensaker Khristantemi meranga aazükba sen ajak akoksaogo. Onok (Khristantem) ya yimjung meimba nisungtem lir aser onoki tangar nem timtem magütsür. Ajisüaka tangari onok anema inyaker," ta ashi.

Tesüiba küm 22 tashi

Telangana kübok Mahabubabad jila nung aliba Gethsemane Prardana Mandiram Arogo nung Afzal-i pastor inyaka arur. Iba Arogo nung züngsem 100 dak temai ki tamajung ka nungdang tekülem sentong agia arua liasü.

"Tenla ki tajung ka yanglutsü atema onoki küm 22 tashi yongyaa liasü. Yashi tatalokba (Tenla ki raksatsüba) ajanga ni aser ozü Arogo melung kanga raksaogo," ta paisa ashi.

Iba tesem nung aliba pastor telok kati police ajurua Tenla ki raksatsüba ken o agütsüogo aser police-ia aibelenertemji bushia aputsü ta nangzükogo


ANOGO ABEN TSÜNGREM DEN

JUNGJUNGA MEYOKTEP (ISAIA 40:1-11)

"Aser ochi nungi parnok tenarong meyipa otsü dangi aotsü, ibala mapang arutsü. Saka nai ajak nung teshisadang liang, timtem aremang, sayutsüngir mapa inyakang, ne tenzükba mapa abensajang!" (2 Tim. 4:4,5).

Yohan Baptitsüba pa mapa nung kanga nendaka jangraba tenzüker ka liasü. Kwikati Yohan ama tenzüker parnok ajak Yisu sülen anidakertem aküm. Tanü azüngba Lai nung ajemdaker Yohan Baptitsüba aser tanü Khristan tenzükertem temetemdangba kar agütsür.

1. Yohan tetsü pok nung alidang nungi Tanela Temeshi agi sünga liasü, saka tanü sayutsüngirtemi shirnok teperi ogo parnok tanela den sendakteper. Tsüngrem O pa dangi aru (Lk. 3:2); saka parnok dangi jungkai adokba aika zülua aliba Tsüngrem O den meputeper. Pa lisem lima nung alir ka, nüngtuku aginüba ajak nungi pilaa liasü, mepushi (Mt. 3:1); saka parnoki yimti nung alitsü meimer, aser konang bushir.
 2. Yohan Tsüngrem nungi aruba ola ka liasü (Yn. 1:23), saka tawa tanü sayutsüngir temesüktep kar ola ongmetang lir. Pai tenla sapang mebushi saka nisungtemi pa bushi anungji pa osangji tangar den memeyoktep (Mt. 3:5, 6); saka parnok tenla sabang bushirtem lir aser parnok sayutsüangi dang parnok osang tajang masür aser tanaben majar.
 3. Kodang nisungtemi pa nungi angashi parnok temenen nungi temulung meyip (Mt. 3:6); saka kodang nisungtemi parnok nungi angashir parnoki parnok nem tenüngsang agütsür. Pai obendangba yakta arutsü ta ashi aser tangashirtem kümdangdaktsür (Mt. 3:10); saka parnoki tarutsü temoatsü, azükaru indang jembii aser parnok temulung lemdaktsü.
 4. Pai temulung memeyipba yimsü nung lenirtem dang per chirtem ta aja (Mt. 3:7); saka parnoki temulung memeyipba lenirtem dang parnok tashi mait aser nüngdak mashir.
 5. Yohani Alima Tesangwa asoshi kuli asü (Yn. 1:8,9), saka tawa tanü ainkartemi mangdang nung asüakümer. Pai Yisui temenen bener Aosang aser Temeshitettsür ta sayu (Yn. 1:29; Mt. 3:12); saka parnoki Yisui tebilemtsütem Bentettsür ka dang ta sangtonger.
 6. Pai sayatenya kecha meinyak saka Kibuba asoshi nüburtem renemdaktsü (Yn. 10:41; Lk. 1:16,17); saka parnoki sayatenya nung jangrar aser nisungtem memelenshii toktsür. Pai nüburtem dang parnok akaba nungi noklang shilem nung tenembo sensaker nem agüjang ta ashi (Lk. 3:11); parnoki nübur dang parnok ter shilem agüjang ta ashir aser parnoki temoatsü aginüra tenla agüjang ta zülur.
 7. Chubai nüktapangtaba asoshi pai chuba arütsü (Lk. 3:19-20); parnoki ochi mashi politician nem tenüngsang agütsür aser parnok maongka bushia sübokrem agütsür.
 8. Pai ashi, "Pa (Yisu) ulutsüla, saka ni asotsüla" (Yn. 3:30); saka parnoki Yisu tenüng nung parnok dak rangloker. Pai Pa nütsüngtem dang sarasademtsü sayu (Lk. 11:1); saka parnoki parnok nütsüngtem dang kechisarena ajak ratetta zülutsü, atangji tenlaa dena, ashir.
 9. Pai chiyongtsü tongmelang chiyongtsü chiyong aser tongmelang sobutsü sobu (Mt. 3:4); saka parnoki lalushibonga sobur iba jagi tongmelang tamanger ratadaktsür.
- Ni alidak Yohan Baptitsüba ama tongmelang taküm lia Alima Tesangwa asoshi ochi kuli süa alitsü yariang, Oba. Amen.

OLONG PAITEP # 5702**TIPIEN**

2. Teburtemi tejak nung awaba - (8)
 6. T _ _ _ em - (3)
 8. Tzük ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzü angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtaklir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaksü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsüngda - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanüdangtsü - (4)

OLONG PAITEP # 5701 TELANGZÜBA**TIPIEN :**

1. Telok, 4. Aluru, 6. Ozüng, 8. Emk,
 9. Kin, 10. Teti, 12. Süir, 13. Jen,
 14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
 5. Lenti, 7. Tajangzük, 11. Teronem,
 12. Sempa, 13. Jahaz.

**OTSÜ TEKA TACHIJI O TABALEN NA RARABA**

Ken mapang ka nung teka tachiji o tabalen na kanga sashia raratebaja. Idangji teka tachiji jagi o tamajung aika shia, na ya tazütsü atema atenba dang ashi, temang shilem nung na ya nüngdak mali sala. Na ya tagidak maka a ya, ta ain adoka rasaa merenshir o tamagitsv aika shia merenshia ja.

Aji süaka teka tabalen jagi ola madoki aremzüka. Anosa o tamajung aika shia kanga jashidaktsüaja. Anungji joko tabalen jagia kanga jashir, aya oda ashir ashi anaprong pei tata shilem inyaker nung nai ni yamai mezüngmeshir süra nia kü tashi sayutsü koka lir ta langzua ja.

Idangji ano teka tachiji ain adoker, hai nai kechi tashi sayutsettsü shiang ta tali jashiaja. Anungji shidak ta tabalen jagi shir, tanü putu nung ya ni mali nungbo na ya tazüngla ya langzua ja.

Ano idangjisa ain tali adoker teka tachijiji na shiba kechi tanü putu ta ashiraja.

Idangji nabo asen temang atema dang nüngdak, saka ni kuli mesüra na-a amajok hai- ADHAR CARD nung na temang rangben atema ni kuli mesüra alima nung ya melitetsü. Aya-a ajibo shidaka noo ni liaka central Indian government-e na ang bushiraneeeee

Tangazüktsü: Mebilemdange tangar mezüngmeshi masütsüla.

Lilir - N. Saku Imsong, Diphupar Dimapur

TANÜBO NAI LANGZÜANG

Q. Henry Passport Index 2021 nung Nepal koba rank nung lir?

A.102

B.104

C.106

D.108

===== (Taruba adok nung onoki langzüksü)

YASHI ADOK TELANGZÜBA: Ministry of Women and Child Development



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?**INDIA NUNG NÜBURTEMI SAPUA ALIBA MOTORCYCLE KAR: DECEMBER 2020**

1	Hero Splendor	1,94,930
2	Hero HF Deluxe	1,41,168
3	Bajaj Pulsar	75,421
4	Honda CB Shine	56,003
5	Royal Enfield Classic 350	39,321
6	Hero Passion	36,624
7	Bajaj Platina	30,740
8	TVS Apache	26,535
9	Hero Glamour	19,238
10	Yamaha FZ	14,161

SUDOKU # 5743

6	7	9	3					
4			7	9	2			6
	1		5	8	6		4	
		8						
		3	1	6	8	2	9	7
2		7		5	9	3		
						9		
8	5		9	2	1			
9	3			4	7	5	8	2

TELANGZUBA # 5742

4	2	9	3	7	6	1	8	5
8	3	6	4	1	5	7	9	2
5	7	1	9	2	8	3	4	6
6	9	8	7	5	3	2	1	4
3	4	7	1	8	2	5	6	9
2	1	5	6	9	4	8	7	3
9	8	3	5	4	7	6	2	1
7	5	4	2	6	1	9	3	8
1	6	2	8	3	9	4	5	7

OJANG LUTEP # 5290

LOTEK	:	
NGNU	:	
OKESEMLR	:	
UNTAJG	:	
BAALI	:	
ANGAJA	:	
GRONRONG	:	
KAMAI	:	
NESÜPA	:	
TANGEMBER	:	

OJANG LUTEP TELANGZÜBA # 5289

**PEI SASA MERÜK MEJUTSÜ MEMETETRA TANGARI
 MERÜKTETER YUTSÜBA NUNG TEJANA**

TAN HOPTA ATEMA - KOMA SÜLA ?

Q. Asenok kidang kilir ayuba yimya ya anen nunga koma süla ?

Olong 20shi nung January 22, 2021 tashi nung iba telangzuba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Patiala, January 22, 2021: Republic Day nü aluyimertemi Delhi nung tractor rally agitsü aliba atema Hokolbarnü Patiala nung aluyimertemi renemshia tractor rally agiba noksa nung angur.

Sorkari benokbaji aluyimertemi magizüker; maneni longkak aittsü

New Delhi, January 22 (Agencies): Centre sorkari aluyimertem dang aluyimba ozüing tasen asemprong küm ka ser tesadang agiena atatsü benok, saka aluyimertemi ibaji magizüksü lemtetba den külemi longkak tesashiba aittsü lemtetogo.

Brihostibarnü anogo piyong aluyimertem unions aser Centre sorkar na tsüingda senden mena liasü saka telemetba magitet.

Osangbener den jembidang All India Kisan Sabha Tir, Ashok Dhawale-i, aluyimertemi

maneni longkak aittsü bangjemogo, ta metetdaksü.

Ashok-i, "Sorkari khenpiga atema aluyimba ozüing tasen agiena atatsü atema benokbaji onoki magizüktettsü. Sorkari benokba onük jagi onok melung masür, kechiyong onoki ozüing asempronglaji agiendaktsüner aser aonsotsü ajak atema MSP agütsütsü ta sorkar nem nangzükdaktsüner," ta metetdaksü.

Aluyimertem tentet den mejembitepi sorkari item ozüing benok, ta shia Ashok Dhawale-

i, tang tashi nung sorkar den senden amenbaji amajok dang, kechiyong sorkari aluyimertemi akhangba magizüker, ta metetdaksü.

Honibarnü Nashik nungi gari 20,000 nung aluyimertem mener Mumbai-i aoba sülen Azad Maidan nung adenshir anogo asemnü longkak aittsü. January 25 nü aluyimertem longkak aita Maharashtra Angh, Bhagat Singh Koshyari indang office tashi aoba sülen pa nem temepishiba shidi ka agütsütsü.

SII nung mi lendong tatalokba bushisüngdangtsü sorkari tuyuogo

New Delhi, January 22 (Agencies): Brihostibarnü Pune nung aliba Serum Institute of India (SII) campus nung mi lendong ataloka nisung pongu asüba sülen iba tatalokba bushisüngdangtsü atema Maharashtra sorkar agencies nungi fire wings tongti ketdangser asem shimogo.

Serum Institute of India indang Manjari facility nung ponguben amentepa yangluba ki arongba lendong nung aayanger pongu asü.

Iba tatalokba ya Pune Municipal Corporation (PMC), Pune Metropolitan Region Development Authority (PMRDA) aser Maharashtra Industrial Development Corporation (MIDC) fire departments nungi tongti

ketdangser aseme bushisüngdangtsü.

Mi lendong nung building temaba ana rongdok aser takoksa kanga nguogo.

Chief Fire Officer PMRDA, Devendra Potphode-i, planning & development authority, PMC aser MIDC nungi ketdangsertemi iba building nung mi adokba kuli jangjatsü merangdar, ta ashi.

Ano külen police-ia accidental death & burning incident ken o ka Hadapsar police station nung benokogo, ta Deputy Commissioner of Police (Zone 5), Namrata Patil-i metetdaksü.

"Agency balalai bushitetba nung ajemdaker miji koma adokar kuli jangjatsü," ta pai ashi.

Iba tatalokba sülen SII Chief

executive officer (CEO), Adar Poonawalla-i, Covishield yangluba tsütsü timtem majurutsü, kechiyong production buildings aika lir, ta metetdakja liasü.

Pai twitter ajanga, "Sorkar aser nüburtem nem ni ya metetdaksür, #COVISHIELD production tsütsü timtem majurutsü, kechiyong item ama nüngdak mapang amshitsü atema ni @SerumInstIndia nung production building aika reserve süa lir. Pune City Police aser Fire Department dang kanga pelar," ta metetdakja liasü.

Manjari facility ya coronavirus vaccine- Covishield yangluba tesem rongnung densema lir. SII-i yangluba coronavirus vaccine ya tang linük nung health workers nem agütsüdar.



New Delhi, January 22, 2021: Hokolbarnü Vigyan Bhavan, New Delhi nung Agriculture & Farmers' Welfare Union Minister, Narendra Singh Tomar aser Commerce & Industry Union Minister, Piyush Goyal nati aluyimer unions balala nungi lenirtem den senden 11benbuba amendang tangokba noksa nung angur.

June ita tashi nungbo Congress-i party Tir shimtsü: K C Venugopal

New Delhi, January 22 (Agencies): Congress party-i taküm June ita tashi nungbo party Tir shimtsü; Hokolbarnü Congress working committee (CWC)-i state kar nung assembly election tembangba sülen party internal elections agitsü lemtetogo.

CWC senden ghonda asem ser tesadang amenba mapang nung, state pongu nung assembly election agiba sülen party internal election agitsü atema sentong yanglutsü asoshi tang Tir teinyakdak, Sonia Gandhi nem tashi agütsüogo.

Osangbenertem senden nung jembidang Congress lenirtem- K C Venugopal aser Randeep Surjewala nati, CWC election-a agitsü, ajisüaka Congress Tir meshimdang agitsü asü shimmer sülen agitsüar ano telemetba magi, ta metetdaksü.

Hokolbarnü senden nung CWC-i bangzüng asem renemogo; bangzüng asemji-aluyimba ozüing asem agientsü atema akhangtsü, national security aser Official Secrets Act alema inyakba ken o JPC nem agüjang ta akhangtsü aser sensakertem nem mapang telemsa makai Covid-19

vaccine agütsütsü atema akhangtsü.

"Kechi südir süaka taküm June ita tashi nungbo Congress Tir shimtsü atema CWC-i telemetba agiogo," ta AICC general secretary, K C Venugopal-i metetdaksü.

"CWC züngsem ajaki melungtepa Congress Tir (Sonia) dang internal elections ji assembly elections mapang nung magitsüla ta shiogo," ta paiza metetdaksü.

Pai ashiba agi, election agitsü onük nung mangatettep maliasü. Senden junga menogo. Organizational election agitsü onük nung mangatettep maliasü.

Madhusudan Mistry-i aniba CEC-i AICC Session aser party Tir election ji May 29 nü agitsü aser May ita nungi tenzüka nomination file asütsü benoka liasü.

2019 küm May ita nung Lok Sabha election nung Congress party-i tamakok anguba sülen Rahul Gandhi-i Tir menden toktsü aser 2019 küm August ita nung Sonia Gandhi interim Congress Tir shima liasü. Iba sülen Congress party nung lenir kari party asentenshitsü atema toklang party Tir ka shimtsü atema takhangba agüja arur.



Kolkata, January 22, 2021: Hokolbarnü Kolkata nung TMC MLA, Rajib Banerjee-i West Bengal Forest Minister menden toktsüba sülen pai Raj Bhawan kima osangbenertem den jembiba noksa nung angur.

Official Secrets Act alema inyakbaji JPC-i bushisüngdangtsüla: CWC

New Delhi, January 22 (Agencies): Tawa Arnab Goswami indang WhatsApp chats prokshiba dak sendakba nung Hokolbarnü Congress-i, linük security raksaba aser Official Secrets Act alema inyakba tatalokba ya joint parliamentary committee (JPC)-i bushisüngdangtsüla aser shilem agia alir ajak anema ken o benoktsüla, ta takhangba agütsü.

Hokolbarnü CWC senden nung renemba bangzüng nungji yamai shia lir, "Linük security raksaba, Official Secrets Act alema inyakba aser iba nungji shilem agirtem jangjatsü atema mapang atakzüker joint parliamentary committee kati bushisüngdangtsü CWC-i akhanger. Iba sülen aibelena alir ajak anema ken o benoktsüla aser temerenshi agütsütsüla."

"Iba nung ya shilem agia alirtemji sorkar tongti ketdangsertem lir, ta jangjar aser iba ya sepaitem operation indang

miim sentong tema nung prokshiba onük ka lir," ta CWC bangzüng nung shia lir.

Iba ya ajanga Modi sorkari taaktsü makai sorkar nung dena malirtem den külemi inyaksemba kuli jangjar ta CWC-i ashi.

CWC-isa, iba tatalokba jungkai adokba sülen anogo aika süiogo, ajisüaka Ato kilonser aser Centre sorkari iba onük nung ola madokba atema onok süngmanger, ta metetdaksü.

Republic TV editor-in-chief, Arnab Goswami aser taoba mapang Broadcast Audience Research Council (BARC) chief executive, Partho Dasgupta na tsüingda WhatsApp ajanga jembiba ajanga Ato kilonser, Modi-i aniba sorkari Pakistan kübok Balakot amaktsü atema miim sentong yanglua alibaji Goswami-ia meteter liasü ta bilemer.

Pakistan nungi kiralonggartemi Pulwama amakba sülen ibaji mangyanga India sorkari Pakistan kübok Balakot amak.



Zimbabwe nung COVID-19 tashidak agi minister Dr Ellen Gwaradzimba asüba tasü mang süngten bener Harare nung aliba Heroes Acre-i bener aoba noksa nung angur. Iba asüpila sentong ya Zimbabwe Tir Emmerson Mnangagwa-i anir agi aser iba tashidak wara dang 'temenen' ta aja aser nūburtem dang mask agitsü, social distancing yimya amshitsü aser mürekmejutsü ajungshi.

Sriwijaya Air nung asür kinungertemi tayimtsü tsükokba tesem semdang

Jakarta, Aenjeti/January 22 (Agencies): Sriwijaya Air indang tayimtsü January 9 nü tsükokba mapang asür kinungertemi Hokulbarnü tzüim nung naro temesung aser temerem inoktsüba mapang jeptepa liasü. Indonesia navy indang rong nung parnok ya Java Sea nung iba tayimtsü tsüokdak tesemi anir ao, kong parnok kinungertem takum sama.

Tayimtsü SJ 182 ya Jakarta nungi apusor minute ishika tsungta tsükoka iba tayimtsü nung mena alir nisung 62 prong asü. Indonesia ketdangsürtemi Brehostibarnü asürtem temang

bushiba anen saka tayimtsü indang cockpit voice recorder (CVR) maneni bushitsü, ta metetdaksü.

"Ni tzüim nung naro inoktsüba mapang künu tejak bilema aru. Nüktzü aluba manen, tzü nung pa tejak angur ama bilem," ta tanur ana tebu Heri Purnomo-i ashi, shiba tenu Nurkholid Fatil Amin iba lendong nung asü.

Search and rescue operation agiba mapang tzüshir temi tayimtsü teraksa aser nisung temang shilemtem ngutet, koba DNA jangjatsü atema police hospital kati bener ao.

Iba tayimtsü tsükokba ajanga airline ajunga kanga jashir, ta Sriwijaya Air Chief Executive Jefferson Irwin Jauwena-i ashi, shiba rong nungya mena liasü.

"Sirwijaya Air Group nung ozü kinungeria süogo. Iba lendong ya ajanga ni kanga aoksa," ta pai ashi aser airlines ajanga asür kinunger nem teyari agütsütsü nangzük.

Iba lendong nung nisung asüba shia kinunger nem sen 1.25 billion Indonesian rupiah (\$89,000) agütsütsü, ta Indonesian transport minister Budi Karya Sumadi-i Bodhbarnü sangdong.

Navalny Russia-i arudang aputsü pai meteter liasü



Alexie Navalny (File photo)

Moscow, Aenjeti/January 22 (Agencies): Opposition lenir Alexie Navalny ya Russia-i meyipa meshilang dang nungi pa aputsü aser longkak aita pa chiokdaksütsü pa aser pa busemer temi meteter liasü, ta pa tembar kati ashi.

Tir Vladimir Putin anemer tejangja, Navalny ya kidangi meyipa shilangba sülen bendanglen temang anepalua munga liasü aser anüolen linüktemibo pa dak military-grade nerve agent amshi ta ashir.

Arishi küm 44 tain Navalny ya tang Moscow prison tamajung ka nung yua lir aser ken o pezü jembitsü atar. Putin-i pa tepsettsü meranga totuyuba

agütsü, ta pai ashir saka Putin-i aji magizüker aser US teyari nung pa tenüng menüksütsü merangba sentong nung Navalny ya shilem ka lir, ta ashir.

Kremlin dang pa chioktsü asoshi totuyuba agütsüdaktsütsü atema Navalny'er tembartemi Honibarnü linük tesem ajungalen longkak aittsü sentong lir, koba asükwa mapang tashidak wara agi sünger alidang pa busemer tendangba mapang ka asütsü.

Opposition tem sentong nung Putin inyakyim bushisüngdangba indang video tem sayatsü dena lir, ta Navalny tembar Leonid Volkov-i ashi. Parnoki Mongulbarnü iba ama bushisüngdangba video ka saya

liasü, kong parnoki rongsen jenti indoka yangluba Putin indang ki tuluka indang otsü sayu, saka Kremlin-ibo iba ki ki pa indang masü, ta ashir. Iba video ya online nung million 53 ben reprangogo.

"Nübur ajungai longkak aitiba Kremlin-i tsübur ta onoki meteta lir," ta Volkov-i ashi.

Kremlin den tesendaktep tajung aliba osang anati ashiba agi, Navalny ya tetsükdaksü ka kumogo aser pa busema longkak aitaka pa tepuokdak ayutsü ta Kremlin tangatetba lir.

Navalny mejungi amshiba aser ki tulu ka indang video ajanga nūburtem ola adokdaksüner.

Saka sorkari longkak aiter atema temerenshi tesashiba yanglua lir aser arishi küm 68 tain Putin ya anokshitsütsü makok amai ajiteter.

2013 küm court kati Navalny ya küm pongu tepuokdak ayutsü obendang agütsü, saka Kremlin anasa nūburtemi longkak aitiba sülen pa khen atema chioka liasü.

"Asenoki iba mapang takok nguogo, anungji asenoki tanga takok angutsüla. Tongtipangtibaji asenok tsüba malitsüla," ta Volkov-i Brehostibarnü par telok busemer dang YouTube ajanga ashi.

Hong Kong nung nisung aika nem tenokdangba agütsütsü

Hong Kong, Aenjeti/January 22 (Agencies): Coronavirus tashidak asendenshir prokshia aoba nokdangtsü ateam Hong Kong nung alir meyirejang aika nem tenokdangba agütsütsü, koba wara tenzükba sülen iba yimti nung tenokdangba agütsüba mezügbuba asütsü, ta local osang kaket kati Hokolbarnü metetdaksü.

South China Morning Post sangdong ka ajanga ashiba agi, iba ken o jangja aliba source kati, iba inyakyim ya Jordan aser Sham Shui Po district dak rangloker benoktsü, koba Kowloon Peninsula nung tesem tila ka dang saka nütsüngyokgsük aika lir, ta ashi.

Iba district nung ki tejen aser ki tem akanga tsüngtepa yanglua lir, kong tashidak temelaba menatepyonga aotsü.

"Iba tesem nung nokdangtsü mekoki tashidak prokshia aoba aser sewage surveillance ajanga tashidak ano mazüoktetei lir ta ngutetba den ola madoker aika iba tesem nung lir," ta source kati ashi.

Health ketdangsertemi iba tesem nung mezüng block pezü mokdanga toktsüogo aser item tesemtem nung nūburtem pei ki toktsür aotsü memelai ajak quarantine südaktsüogo.

Iba tesem nung alirtem ajak dak tashidak medendang tashi aser sorkar temulung masü tashi mokdanga ayutsü, ta osang kaket ajanga metetdaksü.

Hong Kong nung taoba küm nisung 10,000 tekübok dak tashidak potet aser nisung 167 dang asü, koba tanga yimtittem den medemdangra kanga ajemer.

Taoba hopta yimti nung civil servants tem pei kidang nungi mapa inyaksü asoshi mapang atsülangtsüogo. Tanga

tenokdangba agütsür aliba rongnung 6:00 ako sülen in-house dining memelatsü aser gyms, sports venues, beauty salons aser cinema amala shibanga toktsüba densema lir.

Hong Kong nungsa flight crew tem ghonda ana dak tema anenzüktsüpurtem hotel nung hopta ana quarantine asütsü latetogo.



White House, Washington nung aliba State Dining Room nung US Tir Joe Biden-i kaket ka amer coronavirus tashidak indang jembiba mapang tangokba noksa nung angur.

Baghdad nung bomb pokdaktsüba Islamic State-i nangzük

Baghdad, Aenjeti/January 22 (Agencies): Brehostibarnü Baghdad nung nisung anati pei temang nung bomb alener pokdakja nisung 30 dak tema tepsetba den aika yirutsüba ya Islamic State puri parnok mapa ta nangzükogo.

IS-i, parnoki Shiites pur dak rangloker bomb pokdaktsü ta ashiba Brehostibarnü IS-affiliated website ka nung prokshiogo. Kasa sangdong nungsa mezügbuba bomb Abu Youssef al-Ansari-i pokdaktsü aser tanabuba bomb Mohammed Arif al-Muhajir-i pokdaktsü ta shia lir.

Brehostibarnü iba lendong nung nisung 32 asü aser nisung 100 dak tema yirua liasü. Yirur alir rongnung karbo kanga mejungi yirur lir. Ketdangsürtemi ashiba agi, mezügbuba nisung yagi shishilembadak ka nung pa temang majung ta ayimden aser

iba ajanga pa meketa lokti aika adenshi aser iba mapang nung pai bomb pokdaktsü. Mezügbuba bomb apokba sülen mapang tatsüka dang lir tanabuba bomb pokdaktsü.

U.S-i aniba teloki tawa IS anema rara anenogo aser tanem tanemi Iraq nungi sepaitem anindar aser iba ajanga IS telok tanaben poktettsü ta tsüba bilemer. 2017 küm Iraq sepai aser U.S-i aniba teloki loksatsüba sülen IS pur linük yimtibai meiteti liasü.

Küm asem tsüngda tang mezügbuba linük yimtiba makogo. Kasa mapang nung Iraq anüdoklentip aser anüolen lisemlima nung IS puri maneni Iraq sepaitem maka arudar.

Taoba küm sorkar coronavirus tashidak azüoktsü atema rangloker inyakba mapa telungpurtemi maangka agia tesem aika makogo.

Pelaba Lemsateper




**ONOK NÜKDANG NUNGIBO OGO SAKA ONOK MULUNGJANG
NUNGIBO KODANGA MAOTSÜ**

Ozü temeimtila Ojala, **TAKALA PONGEN** tesünep nung January 9, 2021 anogo nung alima nungi pilaa ogo. La taküm alidang ajururtem aser tongtetertem ajaki la anogo shia kanga menungraa bilemtetsü.

Lai asoba ajaso, kinungtsü aser semchirtem aliba ajanga la takümji maneni senmang kuma lia aotsü. Onoki na kanga meimer, Oja !

Onok timtem mapang yaritepba asoshi DABA; Mopungchuket Senso Telongjem, Dimapur; Tembar Medemertem, Kidang Kiyongertem aser kinunger adianutem ajak dang onoki kanga pelaba metetdaksür. Tsüngremi nenok ajak Moajangma !

MULUNGZEN O



Aso : 01-01-1922

Asü 13-01-2021

Onoki teti meima aliba Tsürabur asür **TAKUKUMLA** (Yajang) timtema aliba mapang nungi tasüba anogo tashi nung kija, kibong aser lokti kwinakati nübu, rongsen, sarasadem aser shisatsü agi onok den yaritepogo nenok ajak dang kanga pelar. Nenok ajak dangi tsüngtong arua tepela melemsateptet nung iba osang ajanga lemsateper. Nenok temeim mapa tajung onoki kodanga mamatsü aser ozüi kecha meyipa agütsütsü makok saka tulusang takar Tsüngremi nenok moajangma ta aji ozü tamang sarasadem.

- Temeim chirnur, semchir aser kinunger

OFFICE OF THE AONOKPU SENSO MUNGDAW DIST. MOKOKCHUNG:NAGALAND TENÜNGSANG AGÜTSÜR



Mr. K. Imliyang Jamir aser Mrs. N. Atula Imchen jala **Dr. Moalila Jamir**-i Christian Ministry (Education), Senate of Serampore College (University), "An Exploration of Liberative Education Processes in the Writings of Bell Hooks and Mary Elizabeth Moore and their Implication for Developing a Transformative Christian Education in Nagaland" onük nung Doctor of Theology (D.Th) ngutetba asoshi Aonokpu Senso Mungdangi Tsüngremi tenüng asanger aser la den konang tetushi lemsateper. La taküm aser wadang ajak nung Tsüngremi ano maneni temjena moajangma.

Sd/-
L. Akumba Ao
President
Aonokpu Senso Mungdang

Sd/-
L. Rongsentemsu Jamir
General Secretary
Aonokpu Senso Mungdang

Sür Küm Ka Ajungba Anogomung Obala Asür Imzuluba



"Aseni meimbate asen nungi mepilar, parnok asen den anogoshia jajar. Mangur, mangashir saka teti ana nung lir."

Na onok den meliaka onok mulung nung na teti taküm lir. Len aniba petinu ka ama nü tanela onok den teti lir.

Na kanga dang meima menungrar.

- Temeim Kinungertem.

OFFICE OF THE AONOKPU SENSO MUNGDAW DIST. MOKOKCHUNG:NAGALAND TENÜNGSANG AGÜTSÜR

Tsürabur Late I. Pangerlemba Longchar aser Late L. Pusemsangla Walling na jabaso Er. Imkongmeren Longchar, Power Dept. kübok Sub-Divisional Officer (M.S) Promotion anguba asoshi pelaba lemsateper. Sorkar aser nübur tenzüka wadang nung ano maneni moajangma.

Sd/-
President
Aonokpu Senso Mungdang

Sd/-
General Secretary
Aonokpu Senso Mungdang

Wokha nung awareness sentong ka agi

Wokha, Aenjeti/January 22, 2021 (TYO): Hokolbarnü (22.01.2021) Deputy Commissioners Conference Hall, Wokha nung Wokha District Administration, DLCW-MSK aser Wokha District Legal Services Authority (WDLA) longjemer Beti Bachao Beti Padhao (BBBP) kübok ASHAs aser Anganwadi Workers atema

Pre Conceptions and Pre Natal Diagnostic Technique Act (PCPNDT) Act nung awareness sentong ka ayongzü, ta sangdong ajanga metetdaksü.

Iba sentong agiba mapang, ASHAs aser Anganwadi Workers nem Hand Wash, face mask aser sanitary pads lema agütsü.

Advocate, Shanchobeni-i

sentong nung adenertem dang PCPNDT Act indang metetdaksü. Kasa sentong nung EAC (p) Arhonbeni-i o jembi, kong iba ama sentong aser mapatong takok angutsü atema temulung agüja shilem agitsü asoshi lai sentong nung adenertem ajungshi. Iba sentong nung Women Welfare Officer, Wokha, Dr. Wonchano menden liasü.

Vivo-i China nung Vivo X60 Pro+ sayaogo

Aenjeti/January 22, 2021 (Agencies): Vivo-i China nung Vivo X60 Pro+ sayaogo. Vivo X60 Pro+ Snapdragon 888 dena lir, koba Qualcomm indang 2021 flagship SoC alitsü. December 2020 nung Vivo X60 aser X60 Pro sayaba mapang, iba smartphone teaser ajanga lemsatepa liasü aser tang iba smartphone China nung sayaogo. Ajsüaka, international shishilembadak iba smartphone sayatsü asoshi Vivo ajanga ano osang magütsü.

Specification tsütsü reprangdangra, Vivo X60 Pro+ nung Qualcomm Snapdragon 888 dena lir. Iba smartphone ya RAM aser storage variant ana - 8GB/128GB aser 12GB/

256GB option nung angutsü. X60 Pro+ ya classic orange aser dark blue nung angutsü aser screen to body ratio shilem 92.7 alitsü.

Phone indang slim bezels display nung single punch-hole slot keta lir, kong front camera inoka yanglutsüogo. Phone display tasazük inch 6.56 alitsü, kong full HD+ screen resolution den AMOLED panel, 120Hz refresh rate, HDR10 den HDR10+ certification aser 103 percent NTSC colour gamut coverage inoktsüogo.

Smartphone tesülen, quad camera module ka angutsü. Iba module nung 50MP primary camera den f/1.57 lens, 48MP second sensor den f/2.2 ultra-

wide angle lens aser combined macro capability, 32MP 'portrait' sensor den f/2.08 lens aser optical zoom atema 8MP sensor den f/3.4 periscope lens inokja lir. Phone tejaklen punch-hole slot nung 32MP unit den f/2.45 lens keta lir.

Tanga feature tsütsü reprangdangra, Vivo X60 Pro+ nung 5G connectivity, dual-band Wi-Fi, Bluetooth 5.2, NFC, GPS, USB-C 3.1 port, aser 4,200mAh battery den 55W fast charging angutsü. Vivo X60 Pro+ ya 9.1mm tapu aser tuozü gram 190 asütsü. Iba smartphone variant anaprongla jenjang CNY 4,998 aser CNY 5,998 (sen 56,500 aser sen 68,000) alitsü.



Dimapur, Aenjeti/January 22, 2021: Hokolbarnü, Haralu Colony Women Society (Lane 1-2-3)-i nübudok mapa ka ayongzüka liasü, kong parnoki lenmang aser Colony temeket ajunga merüka liasü. Colony telungtet nung alir nüburtem tsüngda merükmejuba maparen tsütsü ajungkettsütsü nükjidong nung iba nübudok mapa ayongzü.

G. Rio Memorial Tournament: Peren aser Mon-i takok angu



Dimapur, Aenjeti/January 22 (TYO): Tang asayaa aliba 1buba G. Rio Memorial U-19 (Boys) Inter-District Tournament tanü Group B asaya nung Peren aser Mon nati takok nguogo.

Mezüngbuba asaya Peren aser Wokha na asayaa liasü. Toss akokba sülen Peren team-i mezüng bat asütsü shim aser parnoki Over 25 nung asayar 7 out ser run 146 yanglu.

Parnok rongnungi Lalkishan (wk)-i run 31, Parbez (C)-i 24, Roko Nyekha-i 22, Ranjen-i 21 aser Poiring-i run 17* yanglu.

Wokha team atema Randanbemo Odyuo aser Thungchio Humtsoe nati wicket anana aser Renben Kithan o Lichumthung Patton nati wicket kaka agi.

Asaya tanabuba shilem nung Wokha team-i over 17.3 nung asayar ajak out ser run 64 dang yanglutet.

Batsmen tem rongnungi Randanbemo Odyuo-i run 14* aser Mhao Tsanglao (wk)-i run 10 yanglu.

Peren team bowler tem rongnungi Vicky-i wicket 3, Parbez-i 2 aser Poiring, Haichuane Newme, Roko Nyekha aser Ranjen nungeri wicket kaka agi.

Iba asaya Peren-i run 82 agi kokogo.

Tanü tanabuba asaya Mon aser Zunheboto na asaya. Mezüng bat asütsü shimba sülen Mon team-i over 22.5 nung asayar ajak out ser run 111 yanglu.

Mon team atema Apunkz

Punknyei-i run 24, Altab-i 21 aser Rakesh-i run 18 yanglu.

Zunheboto team bowler tem rongnungi Alope Aye-i wicket 4, Abhi-i 2 aser Hito K Assumi aser Nighato H Yeptho nati wicket kaka agi.

Zunheboto team bating amenba mapang parnoki over 14.2 nung asayar ajak out ser run 61 dang yangluteta asaya run 50 agi makok. Parnok rongnungi Alope Aye-i run 19 yanglu.

Mon team atema Shejong Konyak-i wicket 3, Airong Konyak aser Altab nati wicket anana aser Apunkz Punknyei-i wicket 1 agi.

JANUARY 23 NÜ ASAYA:

1buba asaya (7:30 A.M):

Peren vs Zunheboto

2buba asaya (11:45 A.M):

Mon vs Wokha.

2buba Tening Sub-Division football asayamung ayonger

Dimapur, Aenjeti/January 22 (TYO): 2buba Tening Sub-Division football asayamung 2021 küm March ita 23 nü nungi tenzüka Tening jila nung asayatsü. Iba asayamung ya Limelight Foundation Tening-i ayongzüka asayatsü.

Asayamung ayongertemi sangdong ka ajanga, Tening temeket nung alirtem aser Nagaland kübok tanga tesem nungi asayamung nung shilem agitsü jangrartem dang asayamung ayongertem den

asayamung dak sendakba nung osang tejangja agitsü atema item number; 6909783848, 6909727437, 9402287872 tem nung tongteprateptsü atema metetaksüogo.

Maneni Limelight foundation-i, Tening kübok Villages youth Organization ajak dang iba asayamung nung shilem agitsü mepeshia metetdaksüogo aser ashiba agi, lanur tejangrartem iba asayamung nung shilem agiba ajanga ajak ajungmesotsü.

Satwiksairaj-Ashwini na semifinal-i iogo; Sindhu tsükogo

Bangkok, Aenjeti/January 22 (Agencies): Hokolbarnü Toyota Thailand Open badminton asayamung nung India nunger tarep temeyoktep asayar Satwiksairaj Rankireddy aser Ashwini Ponappa nati Malaysia nunger tarep, Peng Soon Chan aser Liu Ying Goh na kanga meranga asayar koka semifinal-i iogo.

Telok ana tsünga ghonda ka ser minute 15 asayaba sülen India nunger tarep yagi world no. 6 Malaysia nunger tarep ya 18-21 24-22 22-20 agi koka liasü.

World no. 22 Rankireddy aser Ponappa na quarterfinal asaya tatembangbuba nung Thailand

nunger top seeds Dechapol Puavaranukroh aser Sapsiree Taerattanachai na aser Korea nung tarep Sung Hyun Ko aser Hye Won Eom nunger asayaba sülen takoker den asayatsü.

Kasa mapang nung India nunger tetsür kija asayar PV Sindhu quarterfinal nung Ratnchanok Intanon-i tsükdaksüogo.

Intanon-i iba asaya minute 38 nung 21-13, 21-9 agi koka liasü. La taruba asaya top seed Tai Tzu Ying den asayatsü.

Maneni tebur kija asaya nung Sameer Verma-i kanga meranga asaya saka pai 13-21, 21-19, 20-22 agi Denmark nunger asayar Anders Andersen makok.

IPL auction February 18 nü agitsü: BCCI

New Delhi, Aenjeti/January 22 (Agencies): 2021 season metenzük tsünga IPL atema asayartem auction asüba sentong February 18 nü agitsü, ta BCCI ketdangsür kati Hokolbarnü PTI dang ashi.

"Auction February 18 nü agitsü. Auction agitsüba tesem ano meshim," ta ketdangsüri ashi.

Kasa mapang nung taküm IPL India nung asayatsü asü bendanglen asayatsü, iba indang ano BCCI-i telemetba magi lir, ajisüaka Board tir Sourav Ganguly-i, kidang iba asayamung ayongzüka asayatsü atema takokba tashi inyakteptsü, ta shiogo.

COVID-19 wara poktetba ajanga 2020 küm IPL UAE nung September aser November nung asayaa liasü.

Taruba ita nungi tenzüka India nung England den asayaba ajanga kidang league asayatsü atema lenmang lapoktsütsü imlar.

Asayatem meyipa agitsü atema tatembangbuba anogo January 20 nü tembangogo aser trading window February 4 nü tembangtsü.

Australia nunger nungtugu asayar Steve Smith o Glenn Maxwell na Rajasthan Royals o Kings XI Punjab nati tatembangbuba anogo nung toktsüogo.

YR&S-i Kekhrieselie Rio nem tenüngsang agütsü

Dimapur, Aenjeti/January 22 (TYO): Kekhrieselie Rio-i India aser Asian Zone nung Category A (130 cm) nung takok anguba aser Federation International Equestrian-i agütsüba rangking nung jenjang tanabuba tongtetba atema Department of Youth Resources & Sports, Kohima; Nagaland-i pa nem tenüngsang agütsüba sangdong ka ajanga metetdaksüogo. Iba takok

anguba sülen pa India nunger rongnungi tanü tashi nung rank temaba ngutetba asayar kümogo.

Kekhrieselie Rio-i linük asoshi dang masü saka talisa state nem tenüngsang bener arutsüogo aser iba ajanga senso tajungtem ajaki nemadanga bilemer. Department-i pa takok atema tenüngsang agütsüba den tarutsü nunga takok nung aotsü imlaja ataba lemsatepogo.

Olympic nung asayatsüpur nem vaccine agütsütsüji onok mapa tongtibangtiba: Batra



Narinder Batra (File photo)

New Delhi, Aenjeti/January 22 (Agencies): Indian Olympic Association (IOA) tir Narinder Batra-i Hokolbarnü ashiba agi, Olympic nung asayatsü pur nem vaccine agütsütsüji federation atema mapa tongtibangtiba lir. Batra-isa, iba mapa takok ngua inyaksü atema takaratiba nung sentong tapet ka yanglutettsü, ta temulung lema bilemer.

"Onoki Health Ministry, Sports Ministry aser NADA densema department tepet den sensaksemdar. Onok lenmang shidak nung odar aser

takaratiba nung sentong tapet ka yanglutettsü imlar," ta Batra-i ANI dang ashi.

Mapanglem indang asüngdangba mapang pai, "iba onük dak sendakba nung onok tang sensaksemdar. Maparen tembangba sülen nenok nem metetdaksütsü. Tang tashi nunger linük nungi asayartem nem vaccine agütsütsüji onok mapa tongtibangtiba aser onoki süoki ia inyakdar ta dang shia atatettsü," ta ashi.

Taoba mapang Union Sports Minister Kiren Rijiju-ia, Olympics nung asayatsüpurtem

nem vaccine agütsütsü atema tongtibangsa inyaksü, ta shiogo.

Japan sorkari Tokyo Olympics ayongzüka asayatsü atema rangloker inyakdar ta asayamung ayongertemi Hokolbarnü metetdaksü. Coronavirus wara poktetba ajanga Tokyo Olympics taoba küm asayatsü aliba thinen.

Tang iba asayamung ya July 23 nungi August 8 nü tashi asayatsü renema lir aser Paralympics August 24 nungi September 5 tashi asayatsü.

Asayamung ayongertemi sangdong ka ajanga ashiba agi, japan Ato Kilonser Yoshihide Suga-i asayamung ayonga asayatsü mulungteter aliba lemsatepogo, ta CNN sangdong ka ajanga metetdaksü.

Taoba küm November ita International Olympic Committee (IOC) tir Thomas Bach-i asayartem dang parnoki mamatettsüsa Tokyo Olympic Games nung tajangshiba balaka angutsü ta shia liasü.

"Nenoki Olympic Village nung mapang intokba taküm tepeyong mamatoktsü. Japan nunger medemertemi renemtsür aliba tajangshibatemji jangratademba asütsü," ta Bach-i ashi.